

萬善花室文集

萬善花室文苑卷二

大興方履錢

懷遠縣重修塗山大禹廟碑

夫乾曜奠化庶彙宅躬榛莽兆蒙亭毒嬪起原自曠首霧
若受圖而秉元龍顙神昆承華而纂辟尊虛赫胥之記譙
明祝誦之躔固已權輿帝象網緼泰壹金鏡朗乎六合玉
券書其十華而運徵蒼昊事遠黎黔誌矣荒屯鮮可稽尙
降暨五德紹駕九招籥和迪迹者上聰宰治者迭聖析綴
葉而耀暈裳準結繩而鏤壺簡創因開昧茂於黃炎踵麗
鑠文訖於陶媯世紘以恢清濁以洽然而陽九遘災元二

萬善花室文彙卷二

一

履厄平壤震汨崇陵懷襄洪流之堙放勳所不能濟巢窟
之衆虞韶所不克諧亶惟夏王肇闢昏墊美哉禹功明德
遠矣粵夫有莘啟哲高密誕祥星精貫昴木之宮石紐叶
神珠之瑞執威樞之柄玉斗入胸戴經極之珍鈎鈐在首
錫嘉名於文命奉冥漠於元符觀奇表之所鍾固非常之
聖也時則息壤用廢滔天未窮九載旣勤弗又其績四嶽
僉咨乃圯其族白馬傳刑唐廷所以速明效黃熊避策羽
淵所以顯幽祇禹乃傷前勳之不彰懷厥考之成勳於是
應明徵續世業升石夷理寢薄苦身焦思胼爪胝趾酷沁
懊呀悃勞繁慮巾挂於道履涉於淵跨巨浸則鼃鼃以爲

梁踰翠岑則明虬以爲御行迨徧乎濛汜惟不踐於羽山
而後丕烈綏肆遺蠱弭忘使方命之臣配郊於顓頊汨陳
之罪奏德於皇天養至渥也報至純也故天下咸知大禹
之孝以爲逆瀧之奔非眞宰不靖彝倫之敘非探蹟不獲
達其變乃能窺天地之藏致其精乃能究通塞之界於是
東觀濁河而巨霧獻綠字之箴西至肥水而長人授黑玉
之誥乃復案厯中經答求宛委解於陽沔厲於衡嶽惟神
弗諗再覲始逢蒼水使者銜閭詔而趨迎黃帝巖書黜菴
庭而發秘金簡瓊函瑤編銀瑑巡水之源斯備衍瀆之旨
具柔苟非智瑩形析合契下鑒者曷以臻此故天下咸知

大禹之誠至於沐日浴月流江決河家久旅而若忘門習
馳而不入藁垂負掌橈樁乘泥斬高喬下鑿於溟滓之墟
沙軌山樛泄夫孫皇之質是以濡不給挖脛不生毛裸人
因之而來歸祖女見之而太息辛壬荒度呱呱者棄懷庚
子嚴齋頽頽者候夢故天下咸知大禹之勤若其治呂梁
修大陸創堯岱底雍梁則登乎孟門之上載乎壺口之安
南自華陰以滅高阜東至底柱以疏峻流蔽爲九河莫於
三門太史河而有常徒駭潛而曲指於是穿雷夏之澤決
滎波之滌彭蠡震澤之大以蓄其壘汝漢濟漯之濱以滑
其駛流沙寫弱水浮積石延寒谷引青泉丹沼順乎五行

赤岸黃支排乎四海使鵝首就粒食之生魚民返旬服之
處其操耒耜告成賦於中邦爭息閭閻得庶土之交正故
天下咸仰大禹之功夫民非食則不育食非土則不植所
以惠莫廣於濟元元澤莫近於耕饑渴地鈕旣缺二帝謝
平成之基濫觴未修百王辭廣衍之斥惟能種水豐物爲
萬世利故天下咸知大禹之仁蓋自有熊問道徒劍履於
崆峒虞氏陟方攀弓髯於梧野非絕迹之能溯矧寓內之
未周降至後王或勤外略戴勝虎齒之域穆滿曾游頭痛
身熱之區漢武初啟未有暢垓埏之廣踰血氣之親毛龍
在前飛菟屬後順則鳥獸咸若怒則百霧請命桐柏之君

長稽首而肅兵龍關之華胥褰衣而示卦奇肱三面窮髮
九津銘之岳瀆之經疏爲山海之記故天下咸欽大禹之
神且以叢菁之當烈也舉益使治之而距海距川之患刈
矣以稼穡之宜播也舉稷使務之而艱食鮮食之貺奏矣
童律狂章之徒制其水怪鴟脾桓胡之魅授之庚辰皋陶
則拜厥昌言太嶽則羅爲心呂故天下咸知大禹之明由
是視土觀地分州殊方聲教所隆要荒是暨暨亥把算二
萬八千餘里大章展極五億十選之步渠搜貢珍彘之裘
后土錫蹠蹄之獸愆餘相柳羣帝升臺印檢元都環牧享
禱德有及而不治道無納而不徇故天下咸歸大禹之化

鼓之舞之不軒不翥偉矣哉甯澄之綜敘而亶翳之藻溢
矣於是鐘山燎祀升中於天陽翟秉圭職成於帝天方申
其昆命帝亦去其菁華疾風迅雷彰於笙筦持衡擁璿調
於磬虞蟠龍憤信於其藏元龜協吉於先定共遷虞以事
夏乃猶謙讓而未遑也退處陰河之北陽山之南避嗣於
商均遜賢於成伯旣僉同於朕志始受朔於神宗故天下
咸知大禹之讓時乃榮光興慶雲集百工相和六府孔修
赤文負圖黑風會紀則維貴爵而尙齒先賞而後罰面稽
天若頌小正之時依永和聲譜大夏之律鉤車綏旃命相
士以佐任毋迫深衣禘黃帝以宗鼗朝據饋而趨士夕揮

輅而求言貨幣勸安邑之文金貝鑄歷山之國折額疏狄
俯袂泣囚三年而百姓以遂焉五年而天下復樸矣然後
稽時巡之制而大會諸侯於塗山斯時也肇用大輦載乘
余輪雄虹建旌鳴鳶揭幢元壁若月丹珪如日紛紛回回
肅肅雍雍羣后齊趨霽神並致十有二州之殖罔不覃懷
千八百國之臻猶爲枝屬蓋執玉執帛者萬以爲計僂干
僂冕者日中不遑左應矩而右應繩聲爲律而身爲度塵
精糈於名岫羊玉表虔施彫勒於朔宮雞彝瞻潔則有防
風後至亟徇兩觀之誅屈騫不恭威徙三曾之伐神姦咸
攝魑魅莫逢是以大陵比享俎豆於馨橋廟同規棗盛盼

嚮此塗山之崇祀所以閱億載而無替也爾其山之爲狀則高衍嵒嶒登降崱嶮翠嶂疊修瓊巖迴峙勢峻嶒而獨宏形沌渾而不鬱用能蒸電流颯膚雲澤氤氣奔蕩於千里霧汨通乎層霄挽壽春之上流鎖維揚之巨鎮望巖則衡峯遙佐地崇則岱嶽可循爲坤軸之所必爭天輪之所必奔原夫山之始也脈聯荆陽湍激淮右軫石完婁於其陂狂流滔湧於其際禹乃奮功鑿而洩之刻昏確磈鑿燒破析盤渦旣順疏峽就夷故二百十丈控淮之全四十六里對荆之阜金樞舊穴昆明之劫灰猶存雪岸浮沙伊闕之斧痕夜泛林樹森起若黼黻而朝芝蓋英飛得冠裳之

色是則樂聞截竹奏於禹會之村紛合珠光拂彼啟母之
石塗山之盛煥矣如此而或者謂越裳甲楯卽鼎湖龍去
之鄉蜀路蠶叢亦玉泉負屐之地遂疑余山於渝嶺並遷
神蹟於會稽不知披輿圖者剖古今之分壤考王會者辨
大小之受共自太原宅都晉陽徙邑壞城平池焚兵散物
朝端建鼓車右立綬夫五載巡狩有虞氏之制也四方會
朝夏后氏之盛也立天下之中以秉天下之望而諸侯之
士不留於道路藩維之臣咸懷於天威豈復率九陽之辟
同問道於巴川捨七表之風獨垂於越絕是塗山之可
證者一也至於禪封濶霍銘鼎條荆導淮則自壽春而北

以合乎渦排泗則由廣陵而東以入乎海游泳譙沛疏鑿
翠夔非混混以無稽皆班班之可指豈復先後殊其地而
終始易其名是塗山之可證者二也且夫候人待娶實號
嘉夷女嬌來歸爰妃令德成室台桑之野我造彼昌孕貳
瓊轅之年度功弗子雖綏狐之說無徵化熊之言亦誕而
江淮昏禮尙沿辛甲之辰濠石壻鄉終譜南音之曲是塗
山之可證者三也至於剡水遺墟景棧鐘之制山陰故宙
傳大計之名禮典本合乎省方敷試或隨乎駐蹕壇圍域
樹滋後論之偏疑假葬衣冠嘆前王之不復此皆推帝紀
而足憑求夏厯而能祿雖少康紹業中興窮髮之鄉句踐

仍封創霸文身之俗而黃圖迴別紺谷誰移是塗山之可
證者四也惟是華殿棲神修除承享蘭橈奕奕松栢閑閑
陰映瓊臺淩乎清都之上玲瓏石闕幕乎泰時之中藻扇
晝閉遠降雲華觚棧夕張來咨風后徒觀其枯槎千尺幽
篁百叢元霧重陰闔廳生嘯裊瘦磊砢而垂乳楓鬼盤拗
而挈莖複道霓含楸軒霞滿丹柱欽艷飛鳥企乎明堂文
陛透迤暗虬屬乎岡嶺洵栖真之秘館觀上古之彤庭然
而閱歲愈遼庀工漸圯層楹剝蝕懸棟離披蟲落星枿恐
毀螺書之仁翼頽斗拱遂愆鳳舞之儀何以肅共明禋齋
嚴報秩懷遠縣知縣孫君讓以嘉慶十八年到官救乏振

滯修廢舉隆安養阜成勤恤民隱實寸陰之訓勿懈厥躬
懍朽索之箴克慎庶獄歲奉

朝命聿修祀事陟降在麓懍焉以思深懼夫聖王頌祇之
所弗眷於遐

國家薦歆之典將委於地且謂捍淮之衝者莫如塗山弭
淮之患者莫如大禹廻瀾其父孰迷瓠子之歌高溼不騫
猶據青泥之篆惟我

昭代敷文玉鏡協瑞河圖蟻珠浮於三洲金鼎出於二峽
守斯土者其可不咎揚休祐用布几筵塗墜巍峩鎮茲水
府也哉於是選材如雲構梁不日大裒役徒親佐畚鍤虛

檻尺尺凭其周垣省闔五重駕乎峭壁步武依世室之制
徑圍遵夾牖之風零陵廟前空鼓琴瑟曲阜祠下自闢荆
榛安足比此清鏘方斯煜爚大矣美矣輪焉奐焉蓋經始
於某月日落成於某月日鳩工若干計資若干禮也然後
天儀穆穆庶仗森森貝瑱珠閣之飾以賁其華茅茨土階
之平以返其儉祭則山嶽殿祖玉奈金漿旅實於庭任土
作賁馨香穢達昭告維虔謀勒豐珉以誌不朽乃徵下士
俾抒其文履籛化人毗迹蠻服欽忱綴學但識夫追蠶探
竒欲窺於洞穴竊嘗溯源馬頰乘輦龍門道夏陽之邑而
搜吉金之遺謁祝融之峯而卧穹碑之下懷睿猷之浩浩

攬舊甸兮茫茫胡揚易隘贊述難名則惟推崇德報功之
鉅記維新創造之庥雖敘績於偏隅庶追聲於匪頌來瞻
聖域闡宣尼無間之言載鏤巉崖繼子厚留銘之石銘曰
二儀習坎參漏乘乾天水氣蘊人魚道旋洳河覲帝禱麓
術躡苞庥惟御洪範則詮三仞三沮六沴六事淳灑以漾
漉澗以漬葱嶺派九滄嶼函四陽鳥攸居裸蟲丕被填災
援沈心察形瘖河壇飛錫亥旣奉珠風驚鷁涌水起龍扶
吾誠不忒疇敢以淪乃作司空平成覆載乃總朕師經營
華外干羽格苗絲竹感瑞天下爲家酬勳弗逮信彼塗山
維禹甸之爰始導涯激蕩嶮巖中審山脈剖而爲歧伏淪

恬源通泗會沂磅礴縣流煥爛綺錯海濱東鍵河湄南絡
登詔藩后述職方岳珣戈董威鈎車效樸遠陳龜壁甫棄
舟航礪砥怒丹織縷筐筐靡壞弗臻惟德是翔粉藻灼灼
磬管鏘鏘脫屣一朝扇薰廣運朔正買遷蒸嘗迭晉谷峙
淵和天鈴海潤遺簪九服燔柴干仞荆淮之中宅有幽宮
翳彼白日颯然神風松楸瑟瑟岡阜濛濛元武陝北紫燕
朝東荀淑宰懷史晨相魯肅焉如在揚焉恐侮爰究爰度
式誥式舞沈沈壺奧鬱鬱庭廡斟明水兮椒盤叩蜃窗兮
揚鑿巫善步兮山址蛟不鳴兮江湍淮有茅兮茅三春藉
桂酒兮貢黍稷惟神致禱兮禮樂諧奠淮陽兮

皇國刻桷兮丹楹敢庸兮順則引齡兮無極視此兮偉碣

萬壽恭頌

謹序 嘉慶二十四年
代江西巡撫錢公作

臣聞皇極之建聖王執圜綜德迪化體道守虔以順乎天
政備乎天養而爲天下先爰是錫禔祐之符晉曼壽之策
滂沛沕瀾布濩闔樞上集其休下貢厥福灑灑奕奕何遠
不格懿哉泰初攝提兆其端成鳩得其錄紀齡以億猶有
奇羨說者仰夫翼始以爲莫可繹矣降自授時垂拱羅於
方冊者凡二十有三氏秉位遞運分典垂聲溇瀆攸界疊
穆乃萌然後

上帝昭元化翊景運以式啟我

聖清惟

聖清之受

命也霧貺氛氳寶祚充衍朱果覆林彤雲布甸

世德神武浩穰駢闐傳十三之遺甲掃九性之強藩是建
丕業來蘇垓埏

四聖相續載巍載煥德亘斗極功造天闕植基區夏景揚
萬年欽惟

皇上紹天參軌合太乙之神履黃中之美道凝覆育仁感
願誕克以膺當陽之正統受傳心之茂祉昭華之玉攸歸
金緘之賈可紀於是乎夤大命孚天哲虔鞏左右勞謙日
夕放準循繩而八表該拊木引綱而百端直滋洽之惠深

致龐之化謐秩秩乎至治之勤務可得而述也欽若昊絜
之臨聖敬日躋上答於

南郊

北郊青壇翠幕之陳瑄玉嘉籩之薦震動恪恭鴻文抒誠
報於天眷隆

祈穀之儀率

加推之典

封終南而列嶽光

禮古帝而百神宴靈鬯協辰歡臚福臻至於匡飭煦養敷
夏蒸黎之功有雲蔚風行綜核質文之序延燎嚴乎旻旦

更籤警乎當階勤政之論炳於典籍刻漏之銘輝於記注
乃

召方牧之長

對親民之官拜颺大庭

聖訓是頒戒以慎勤導以慈寬春臺熙樂衽席又安

帝念民瘼爾饑爾寒日有獄訟之勿平爾其陳時臬有祁
暑之或過爾其告用直故均禧叶慶者鏡宇歌謠遐陬元
靜朕垣砥屬要荒逃聽乃

御玉幣

載華旂遵

時巡省風詩

蒞興京展孝思蹕方普惠禮官正儀致謁平

松山之陽蓋清甯之首巖也奉几筵之奠企

岡陵之邃洞洞屬屬容藹而睟退而問風察音悅其敦摯
習國語之和威弧矢之利書事燦奎文之華大禮著慶成
之記所謂親親至恩尊尊大義惟

聖皇之恭孝克通誠於寤寐若夫天駟馳西招搖在東幸
析津之直沽登紫府之五峯循秋獮之

盛烈

蒞木蘭之

行宮虎賁雷動豹尾雲從秉矛乎花準合破乎唐弓豪獸
繫乘奔羽蹋空蹈藉陵踐摘伏追蹤雙幣共抵一發五豨
觀名王以犒樂集甌脫端宿衛舞修橦筒精銳

天威旣振

皇情亦契固非第順夫豫遊之候亦所以申猛氣續戎功
而講武事也且我

國家以武德闢運殊勳偉猷小徵大匡授兵符於金闕毀
神弩於玉堂籠靖海寓蕩滌回疆三百六度積其算九十
萬里開其方

皇上神謨內纂天聲外灌七德是苞四維咸若翦蠶除虻

收鋒斂鐔拓麻里開卡述平雷波擒烏石麾瞻對逆魯特
陶瑪蘭攻羅克實至仁而有勇斯戡亂而懋績丹水勝而
叶簫韶朱旂轉而蒙干戚是以車書合於十洲枹鼓安於
九譯嚮風者接武率職者銜襟燭龍火鼠烏弋雞林陸警
水慄獻寶納琛牂牁冉隴南平東謝之國修其儀琉球俄
羅呂宋日本之長躡其角請朔謝封之使躡於途侍子胄
士之倫躋於學舍生之類靡不濡渥

皇上乃御黼辰以治之詔宗伯太常以禮之錫幣帛燕樂
以饋之設翼宇雅館以肄之卻珍奇大玉以惠之天下豐
矣遠人至矣遂又緝熙右文覃敷典藝陳籍錄圖博覽多

識研究六經琢磨百氏釋莫時聖同揆淵智

俯幸瓊林優游講肄

申命儒臣經撮史鈔齊馳玉軼揚路金鑣上媿宛委中規
妣姚總唐文以千卷固無微而不昭澄是非於往古鑑得
失於前朝石渠寶笈緗裘丹標文穎雅頌明珠大珎

皇上躬演睿思彰施麗藻駕黃鵠之歌逾神鳳之操三集
蔚炳雅詞典邵咏全史以錯綜發麟經之樞奧郁郁乎禕
哉固彌綸該洽日華雲爛而無不曜矣夫天人泰和會極
也美利不言茂殖也下武闡昌孝德也天功時亮陳力也
聲教攸暨廣闢也文德熾隆懿策也

皇上猶乾乾夕惕持之而不盈置戒慎之昭勒恭壽之銘
敬誦

寶錄味爽丕興義利是辨因循是懲上瑞鑠應抑而不稱
然而東風入律南翬表貺圃五采一角於郊馨元秬黃蓂
於鬯延嬉格於泰壇霽液蒸於仙仗二儀璧合而杲映五
星珠聯而晃漾燭焉彪焉觀者翕繹以咸暢若是乎

皇上之以總和假於

天而

天之以百福臻於

皇上者斯其兆歟今以祝釐奠安之歲恭值

皇上六旬萬壽之辰實

龍飛嘉慶之二十有四載也乾亨坤慶氣調時樂羣臣合詞而進曰

皇上聖德怙冒中外禔福庶績其凝羣生成育遠至邇安一意同欲泰元增其神筵山川襄其弗祿仁祚之永祥祉之全滂洋錫羨卓犖蟬聯緜緜翼翼於萬斯年凡在壽宇之下莫不翹頸企踵拱望

丹陛翔洽

聖嘏以忭以延恭惟

皇上舉慶典納頌聲介觴稱壽臚表遂誠於是復

普駿澤

施大賚

播嘉禮

廣錫類

命詞官以

升中

展宗牒以溥

惠

寵覃封以廣孝

優耆年以保艾祥刑

弛於簡憲正供

蠲其積貸

恩榜選於俊髦

坊帛

旌其孝弟煌煌

恩款十有六章自上下下其道大光丕天之豫戩穀無疆
康衢之童華封之叟含景醴飲之民卉儀羽族之耜諷風
溫洛蹈德隴畝沐仁海而忘平津涯戴壽山而量乎高厚
以爲際斯世之盛固生民之未有也臣之愚陋不足以雍
容掄揚然猶以世掌綸誥習聞掌故獲欣覩乎寰宇之彙

慶

聖壽之繁昌且臣受

恩至深懍封圻之任職在宣敷

郵治而不克詣

闕庭隨

祝釐之班仰首懼忭不勝微忱敬陳延洪之緒侑以萬壽
頌一篇以獻頌曰

聖人基命日之在中元氣鼓潤惟感斯通璇璣玉衡幹化
豐融賚威

洪祚承顯攸崇

軒烈

譽謨有嚴有翼我

皇受之幾康永勅星紀再周聽觀毋斁禮交樂應周是敷
錫羣元仰契養以備尊有敷仁義吐哺含殮四生旣得八
節咸情緣區雖廣飲

化銘

恩孳之育之何生不蕃顧之復之何應不速月竊寶裳風
輪卉服結轍象胥駢羅典屬

丕猷具煥

告祀太儀

勳穹於蠻祐福兆祺

皇占雲物甘雨祥曦

皇祈豐年九穗雙歧

重熙克治報成

列祖格時孝享穰穰來祐四方攸同惟

皇是撫本支百世惟

皇是怙怙之益厚匠成噢煦撫之益勤休德矩矱儼加行
葦燕歌湛露登選俊民寵榮耆庶司農上計正賦絀盈

皇日沛哉予貸其徵司寇執讞奉律持平

皇日宥哉予矜其情浩澤所介嘉瑞合宣萬類翹符熙熙

真真安樂作息

聖人之年

聖人仁壽崇高於天上廣下被以賁

皇福鋪陳玉冊誕獻

寶籙懋哉懋哉率茲九服同詞喑聲未罄其祝臣殷燕喜
述職豫章恢崇恩訓對揚

耿光敬抒嘉頌式奉

延慶

聖壽萬年永保無疆

萬壽頌 謹序 代作

臣聞昊旭甯澄錫祐之源毋極天民靜濟葆和之量斯宏
蓋惟神聖踐承翼之端睿節運鈞模之柄金鏡在握玉斗
維權軌世字氓體元順緯是以合萬年而爲一範蘊八極
以奉三辰隆昭運於赤寰鍾景福於丹扆固可稽諸顯德
而協於貞符者也我

大清之開業肇基宅中圖大龍飛朔海鵬運松陽

白山朱果之祥

綠水輝禽之瑞

義圖

軒鼎出震始於大東

堯典

舜謨重光洽於區夏欽惟

皇上膺上聖之聰嗣中天之緒

元辰受璽三載

傳心守至道以儀人炳神幾以燭物五音暢律煦動植之
生七曜遵行照寰瀛之象懿綱釀化自斟文質之宜洪矩
織規不闕財成之迹納羣元於在宥覆總宙於同仁日昭
月融川流雲蔚猶且夕乾若惕宵旰不遑

恭德契乎

天心

睿範式於

祖訓圖書乙覽已停蠶漏之音

實錄寅承始動雞人之唱四推率

典早警農祥五日

疑齋克頒藉禮

召分符而嚴職守

飭羣牧而重旬宣一命之授必親萬機之統毋曠是以翕
和醕美式序敦龐眾績咸熙天工時亮填填之侶欲忘司
契之神皞皞之區其協含和之氣至於

義征不諫

武折遐衝馭羣去害馬之躀養稼剪莠苗之榦三曾
偉略令授紫房九伐

天聲勦成丹浦齊斧麾而播耕不擾捷旌展而恬野初聞
乃擒烏石平雷波開咽隴闢麻里噶瑪蘭之拓土布魯特
之洗兵投版爭歸隨流而攘於是九垓同軌四海無塵金
麟貢碧砮之琛玉塞奉白環之使戴日戴斗率職來王太
平太蒙無思不服千八百國奉正朔之頒四十九旗列蕃
臣之位海市明珠之產溢鮫浦而弗珍莎車大玉之來棄
龍堆而卻獻東序西序侍子列於青衿南庭北庭斥埃通

於丹敬

皇上綏之以嘉惠沛之以至仁荷寵錫之既優見競絀之
胥泯遂又

綜經典學稽古右文表六籍以憲章陳百家而討論微言
探蹟盡宛委之所藏精義窮神積中經之未載采珠船於
藝海

駐羽蓋於翰林

纂千卷之唐文

詠列朝之詩史

味三餘而成三集分八載而宣八風帶鐫恭壽之銘琴譜

光華之頌履冰之慎金鏡先哀流火之時木棉初賦緜表
緇囊之麗芸編芝檢之全人重璠璣戶懷鉛槧若夫

大禮著

慶成之記

展成昭

書事之篇則本

聖學以爲經抒

思文以繼

志

觀風皇澗熙

景祐之裁基

駐旆周京瞻溥原之式廓社枌之茂歸

邁駿於前甯鄙黍之登告屢豐於十稔此則

時巡之制獨企

神游

睿鑒之宣克彰

世德者也至若斗車東指雲罕西馳曲淀青波初日樽桑
之域中臺紫氣化人貝葉之宮水號通津覃敷

帝澤山名如意遙暢

皇情迨乎金律風高瑤天露肅司馬奉梁騶之典虞官獻

秋獮之儀

三駕三驅作黃門之武樂

一遊一豫沛赤子之恩膏誓廣校於長陬大合圍於漠野
龍驤萬乘虎落千屯羽林奮衛士之雄區脫下名王之拜
武功歲肄

政覽時勤省土覩於畿田答封章於

黼幕甘棠宿麥盡動

天樞望杏瞻蒲實殷民事大矣美矣巍焉煥焉

神武至文之宇禮明樂備之期吉金璆石之和函海陽春
之治天珍夙降地瑞畢登五緯珠聯二儀璧合緇文皓質

狎於坳牧之垣銀甕珊鉤溢於大庭之庫罄禎圖之所繪
發祥譜之所臚茲際榮河獻範寶漢浮光合五德之嘉符
彙萬邦之顯慶

皇上御天下之二十四載恭值

六旬萬壽之辰川琛嶽貢巷舞達飲

福嘏日溶

壽祺天介北斗黃神之拱

聖莢周星南山紫靄之騰

帝絃戩穀鳩年鳳紀泰元增玉券之華鯨水鵲林頂祝仰

銀繩之耀

皇上猶持而不盈恢之彌廣

升中

圓緯

錫羨方顛瓣香告神瀆之濱豐帛致介邱之禮

璿源仙牒

恩承舞勺之年菊澱耆英

寵賁建坊之典鴻御之陂未復普貸官租雁戶之賦尙虧
特蠲舊畀駕羅在野鏘鏘吉士之升鷺序盈階奕奕覃封
之賜一十六章之

詔匝宇納於蕃釐萬入千歲之徵

聖人貞於

皇極臣學慚萃擷職隸編摩瀛海摛文欽

聖謨之精一越江選士播

元化之穹窿欣際

仁壽之朝敢忘詠歌之義敬爲頌十六章拜手稽首以獻
扣槃捫籥用抒歸美之誠刻竹引絲謹附矢音之末

頌曰惟

聖紹

天基事定命璣翰已齊瑤光得正

皇圖藻曜帝階日鏡德開道闡動仁守敬

其一

元運丕厚積

洽重暉欽哉

四聖式是九圍我

皇膺祚光於前徽大猷濬發萬象允歸其二敬恭享祀犧尊

虎罍庚拜辛祈丁郊甲社百神受釐三階奏雅

精誠上格以承

天嘏其三翰簡垂露戈鋌聳雲武義乃武文教惟文

化隆垂拱

德旻鴻芬巍巍蕩蕩爲萬禩君其四順扶天關橫亘斗極憬

琛負賚請朔奉職

皇靈詠蕩是撫是翼蒼兕韜弓元蚪憑軾其五禮經樂律陰

端陽倪宮儀聿纂麟史旁稽經筵帝典國學天題

三集炳煥動華日躋

其六

搗宮謙慎官牧是寄酌於民言咨於羣議黛耜省耕

彤階選吏勗爾百箴俾襄郵治

其七

鉤陳駕秋婁宿當辰采

譟施惠問稼行仁崑峯之轡瑤華之輪雲馳天御日岫星

津

其八

十年篤祐孝乎惟孝言蒞

神京瞻循

複廟玉酌昭清瑤緘朗耀鴻慶遐邇明禋福芼

其九

爍爍嘉

况日采月溶卿煙玉露天馬河龍瑞麟交角文雉連蹤

帝命弗宣珍符益鍾

其十

龍圖推莢

天子萬壽廣運愉樂鴻休懿茂集慶乾坤臻祥宇宙禔階

山鞏福源海富

其一

帝惟大賚臣民萬方林林總總覃施無疆憲平時豫迪吉

降康貽顏黃髮拜舞徜徉

其二

帝念宗枝尙養尙長湛露所濡行葦是廣

帝思俊民聿開藻榜秋實春華珠羅珊網

其三

帝宏錫類慶賁官聯五雲之誥綸綍載宣

帝優天爵寵逮耆年百歲之坊餼帛胥延

其四

帝慎祥刑弛於流蔡鼙鼓春鳴雞竿恩沛

帝軫民依逋餘悉貸租緩司農賦蠲職歲

其五

保樂洽壽

延美大光經壇馥郁王會躋蹠清都穆羽忭頌

聖皇於萬斯年受

天之慶

其十六

贈陳丹崖序

陳君丹崖吳之晉陵人也璇壁折源旭日媚谷識鏡泰初
智孕萬宇載籍羣羅富若編貝詞華粵綵麗於春雲丹瓊
遜寶綠蘭謝芬高韻夕騫神明朝起生平著述好事壯遊
東涉河洛先登岱峯北溯京燕至於恆嶽探芝鳳巢叩梧
龍圃上鑿石斧潛啟玉簡導稷邱之士招太室之精於是
天關崔嵬峻坂鬱律怪木拱削陰飈斜趣翠雲橫磴逢躡
皆飛行雨如蓋迴瞬卽霽乃駕熊脰輿層霄前巨靈後昌
容呼吸六氣餐羞五采鍊其形精助爾瞻目蘊異闔奇神
僊是資震逼泰壹不可久居歸來南國湘水千里春陽曳

綈梅粉留眼絲絲波漲瑟瑟天低香芷數尋遊絮一尺蘭
雨酣酒燕風暖人藉讌西陂相樂終日旣而潘岳閒居稽
生倦返緬倦昔時曾當跋履山川凌胸歲月積指寐求華
胥晨則虛境述爲文章宿已陳迹不若翰其寶跗舒乎丹
青彩逐煙遙毫隨錦落遊鸞驚霧柳鱗揚淵潑墨而障空
欲升投袂而銀河俱動表珍銅阿霜生夏簟紀節溫國暑
滿秋紈長安三月弄玉吹簫夕陽一丈落花結珮景不假
臻神所妙領固已僧繇退舍探微慙拙而幽思之偶舒尤
畸士之末技也然而蒿牀溼鋪荷裳不易朋從欲稀坎壈
久處仲蔚之介猶有蓬屋子山之賦獨無小園師榮叟之

帶索啣揚雄之逐貧夫廣寸之珠邳人按視千金之帶燕
客自享目憚管竇徑可規天身披隼翼出而駭眾河鮒無
斗水之需餓麟無落毛之日斯世爭尙契可合言伊人有
懷窮固其所耳履錢齒弱惟倍神交載傾入次公之座知
能養空望長康之廚盡成靈變感言慷慨序而貽之云爾

答董方立書

方立足下七月十五日辱君五月九日手告稔軌道多泰
跋履惟吉豫章栝柏去鄉逾珍叢台毓珠所在爲貴皖中
風雨關上山河敬迓文人爭開新色固知詞源長湧掃洛
塵於前轡筆鋒所推闢太華於駢指秋水伊人白雲遐眷
跂予望之良慰翹想足下年華殿最精采奪羣挹秀南國
抽竒上士連璣眾耀明月尤朗錯佩皆礪青犢增銛加以
二龍長途一日千里元方季方並譽漢世大山小山騁英
齊代比之足下未可云異今者仰披惠簡欣釋高文儷旨
風流懷思往復章安之檄勇若春榮孝穆之書全同古樂

傳音振翼龍鸞嘖於清霄比物樹芬荃蒸溢於仙圃山澤
通氣激天籟之填篋日月有明摛重光於緡錦可謂杼柚
獨操骨韻自成者矣且驂騑在御不遺蹇驂芳菰盈豆猶
戀脫粟狼蒙獎借載深勞伫瓌璋暫得甄之不忘圭臬呈
前對之彌慙鄙以少乏師承長寡藥石徒恃幾微之明未
獲跬趨之步年迨二十歸自西雍遊從時彥與聞講貫延
頸泰岱險道末由投足淵海中流焉濟冥想若契而握管
已違揣摩雖久而襲形殊淺以其固陋終多謬疵耳方立
足下衡宇花飛故園春老流景易逝侘傺無聊寸履初聞
徒招奔駛之譏緘口未弛已罹曉瀆之咎南陽之竹取憎

茅茨龍門之桐辱置爨下低頭馬坂昔人所悲奮翼鵬溟
此志誰展凡我朋儕同遭斯酷怨何勝言足下今居長安
古帝王之都也岐陽之化不泯漢京之治猶存余昔周馳
千里羈遊十年衣裳風古山川氣壯詢此樂土無異舊壤
足下登嘯太乙訪勝甘泉起劉向於天祿揖相如於茂陵
覽懷文章故當益盛比已玉露戒晨金風迅夕野有歸燕
關見翔隼秋寒多厲善保元吉願襲重福益滋令名惟是
江南文水明波一寸灞橋煙柳遊絲十尋廣鳴嚶於伐木
求其友生賦小戎之三章亂我心曲造次答言恕不詮悉
幸借郵傳再惠端綺方履籤白

再答董方立書

方立足下前奉到惠書第三札並新獲隋唐誌榻十種幸甚幸甚破函伫瞬芬彩言溢玉鈎雅麗足稔近學鑿我癖古珍錫羣帖摛華粲粲垂穎皆珠韜翰斌斌凝楛成玉杼列滿座如升太學之堂耽玩兼旬乃作錦囊之貯損茲嘉意勉其慕楷幸甚幸甚自與子別四時將周流鴻鼓風已復北嚮秋草盈陌凋盡江南今已仲冬次寥尤甚僕陳書沒肘擘隸補窻斂卷而嘯不知天地狂吟達戶時無昕夕五夜雖短可燭萬古十年未暇收於寸眸計念足下當乎此時傭業稍闕誦理有隙探志通經則鄭孔潛歛求瑕邱

索則左馬默慚矧乎文章發以情思惟相與酬答不詳何
人欲駕靄雲謁子西國層飆阻魂溼月沈夢衣裾有聲簾
帷無影我勞懷人奈何而已哲舅家居時相過從爲文益
工所遇猶昔楊生劭起同此岑愁足下近作幸速寄覽能
令故人駢手吟諷亦甚快也計此書達當在臘餘春風初
興神骨多解善備旅寒幸加餐飯光彩所臨相見有日

與方立論古泉書

方立足下來書云長安市中古泉銅質爛惡率多質物恐足下於此尙未及深究也請陳其略幸覽采焉蓋自斟元陳樞先定司契迭辟繼道卽稱侷貨逮乎厯山之起範金而爲幣渭叟之遺規圓而成象安陽平陽羸秦垂乎小布五千五百新莽繼以貨刀孝建之後始知紀年開元以前尙無通寶彼泉之源伊其遠矣於是探奇之士證古之餘商周有文憑於彝鼎金石雖廣咨於儒生輸此癖意繫惟孔方好之旣篤爰有四益夫史之爲帙富於淵岳代之改元繁於日星披誦未周茫乎莫憶偶徵異品必事考詢則

僭竊之稱庶不淆於正統絕域之號可無登於中原辨名
既正讀史所資其益一也襄垣之幣字皆從坵安邑之金
文都作曷贊允則太古難名貺夥則梵言莫解形聲同韻
卽可溯夫五代假借成義是可通於六書其益二也文錢
四出已讖塵守之譏太貨六銖迺兆义腰之哭居攝瀆制
而民不克從景和鑄輕而商行轉阻覲貨用之興廢知代
嬗之盛衰其益三也吾人讀書鄙兼謀食不言阿堵久嗤
其愚匿志飛蚨又懲其陋我則貰於杖頭先徵肉好置之
空囊無愧圖書和嶠之癖聊以解嘲劉寵之選差堪自悅
其益四也因此四端更有五失則或推論未廣泥古過深

執太昊之棘而求干楯之形信路史之文而得葛峁之器
九府未啟已有闔模五幣未通預加吉鑠是則強結繩之
朝爲分班楮代茹毛之聖貽以金鬻此一失也又或目受
所域臆評自雄永壽係於外蕃而誤傳西漢太安鑄自大
理而訛爲後涼布泉不辨佩玉筴而曰宜男鍾官未詳鑣
赤仄以符式女是則楚人之謀契行舟而求劍莊生之喻
斷鶴脛以續鳧此二失也自漢迄隋屢製五銖有唐終始
不廢開通質有重輕字分隸楷細核其代始可詳知今乃
釋齊國吉貨之疑遂呼杏九仍大黃布刀之謬忘其橫干
是則雌霓未校莫正其誣蹲鴟相傳奉爲圭臬此三失也

平準之治依在帝都偏安之泉未布四海是以建安直百存於蜀邛赤烏當千徑於江左使其不按輿畿茫羅品類則猶渡淮食橘失之於枳緣木求魚失之於海此四失也且東郭吹竽世多濫列毛生脫穎務在知人登九都之市而索千古之金則必上問軒轅之員次徵有虞之策不知則寶敝帚而自享知則擲燕石於壺盧而罕如豐貨珍如九幣者方且字蝕緣而隨朽株輪飛赤而充下陳推之足下所云或有蔽於此乎此五失也僕少客隴右長遊京燕車跡所抵搜訪靡懈今居江東遂無同嗜履不越閭曉不過帶此志雖博遠使怠荒惟念足下旅於長安秦漢及唐

建都彼國異品所湮或失交臂甚可慨也願是下祗共五
失就此四益撫實摠華遠望爲幸如有所得速以報我